



IROMAG

Odlazni studenti



by IROUNMO

U OVOM BROJU

**MEĐUNARODNI DAN
MATERNJEG JEZIKA**

**46. GODIŠNJICA
UNIVERZITETA**

ŠAHOVSKI TURNIR

DEBATNO TAKMIČENJE

PREZENTACIJA

**MEĐUNARODNIH I
NAUČNO-ISTRAŽIVAČKIH
PROJEKATA**

OKRUGLI STOL

Svjetski dan močvara

Svjetski dan močvara priznat je kao Međunarodni dan od značaja Ujedinjenih nacija, koji se obilježava širom svijeta svake godine 2. februara. Obilježava se godišnjica potpisivanja Konvencije o močvarama od međunarodnog značaja (Ramsarska konvencija) u Ramsaru, Iran, 2. februara 1971. godine.

Od 1997. godine Svjetski dan močvara koristi se za: podizanje svijest javnosti o vrijednostima i prednostima močvara i promovisanje očuvanja i mudro korištenja močvara.

MEĐUNARODNI DAN MATERNJEG JEZIKA

By IROUNMO

O bosanskom jeziku rekli su: "...u ilirskom jeziku bosanski jezik najljepši." (predgovor "Blagu Jezika slovinskoga" ili "Slovníku" iz 1649.) - Jakov Mikalja "I ovo istomači aliti privrede iz jezika dijačkoga u pravi i istiniti jezik bosanski" ("Nauk krstjanski", 1611) - Matija Divković "Mnogo je lijepih rječnika napisano, Sve kao dragi kamen pribranih i omiljenih, Ali nema napisana na bosanskom jeziku, Ni sastavljena u prozi ni skićena u pjesmu, Moje je započeti, a Božije da mi dade da uspijem." (Potur-Šahidija, 1631.) - Muhamed Hevaija Uskufija "Još pet stotina godina turska vlast ovdje da je ostala, ovi negdašnji patareni govorili bi bosanski." (iz Ponornice) - Skender Kulenović "Ovdje su riječi lahko i mehko iz 17. v., riječi lahak i mehak iz 1886, a buzdohan iz 1900. One, i brojne druge, egzistiraju u našem jeziku i pisanju protivno pravopisnim normama od prve (1852) do današnje... Ovdje su ispisani uzorci jezika kojim su pisali naši bosanski šukundjedovi, naši pradjedovi, naši djedovi i očevi. I mi." (Rječnik karakteristične leksike u bosanskome jeziku, 1992.) - Alija Isaković "Pitanje upotrebe maternjeg jezika je elementarno pitanje ljudske slobode i prava svakoga pojedinca da se izražava, da govori, da komunicira, da biva informiran i da uči na svome jeziku." - Alen Kalajdžija

Od 2000. godine u svijetu se, u skladu sa zaključkom UNESCO-a, obilježava 21. februar kao Dan maternjeg jezika, koji je dio kulturnog identiteta naroda, tačka prepoznavanja, različitosti, ali i tolerancije i razumijevanja. Briga o maternjem jeziku je način dokazivanja svijesti o vlastitom identitetu, ali i veoma osjetljivo mjesto tolerancije prema drugom i drugačijem.

Podrška Muzeja Hercegovine je bila prisutna tokom cijelog procesa kreiranja studentske kampanje. Rad naših studenata dodatno su podržali pozivom na jučerašnji događaj, okrugli stol o temi „Uloga Džemala Bijedića u društveno-političkim procesima 20. stoljeća“ povodom 46. godišnjice pogibije Džemala Bijedića.

U svijetu se govori oko 6.000 jezika, a prema prognozama lingvista, do kraja 21. vijeka više od polovine, čak i do dvije trećine će odumrijeti.

Svake dvije sedmice u svijetu se ugasi po jedan jezik. Osnovno za preživljavanje jezika je da se prenosi djeci, da ima institucionalnu podršku, svoje pismo, da se njeguje u školama, medijima.

46. GODIŠNJICA UNIVERZITETA SVEČANA SJEDNICA SENATA

By IROUNMO

Svečanoj sjednici Senata Univerziteta "Džemal Bijedić" u Mostaru, koja predstavlja centralnu aktivnost povodom obilježavanja godišnjice Univerziteta, prisustvovali su Kenan Begović, predsjednik Unije studenata, Lamija Karadža, potpredsjednica Unije studenata, Amir Čaušević generalni sekretar Unije studenata i Mirza Idrizović, član Senata Univerziteta "Džemal Bijedić" u Mostaru.

Svečanu akademiju vodila je Sara Kazazić, predsjednica Skupštine Unije studenata Univerziteta "Džemal Bijedić" u Mostaru.

Svečanom akademijom obilježena je godišnjica Univerziteta, te su uručene rektorove nagrade najboljim studentima, kojima ovom prilikom čestitamo. Rektorova nagrada je svojevrsni dokaz da se trud i zalaganje u konačnici ipak isplate.



Prva konstituirajuća sjednica Skupštine Univerziteta održana je 11. februara 1977. godine i na njoj je donesena odluka da zvanično ime Univerziteta u Mostaru bude Univerzitet „Džemal Bijedić“ u Mostaru. Nedugo nakon toga, tačnije 14. februara 1977. godine, u Velikoj sali Narodnog pozorišta Mostar, svečano je obilježeno proglašenje i početak rada Univerziteta „Džemal Bijedić“ u Mostaru.

ŠAHOVSKI TURNIR

By IROUNMO



Turnir su otvorili prorektor za međunarodnu i međuuniverzitetsku saradnju Univerziteta "Džemal Bijedić" u Mostaru prof. dr. Rijad Novaković i predsjednik Šahovskog kluba Mostar Sead Zekić. Pozdravili su sve učesnike turnira i zahvalili se na dolasku i učešću, čime su dali doprinos obilježavanju 46. godišnjice Univerziteta "Džemal Bijedić" u Mostaru.

Šahovski turnir povodom obilježavanja 46. godišnjice Univerziteta "Džemal Bijedić" u Mostaru

Univerzitet "Džemal Bijedić" u Mostaru, Unija studenata i Šahovski klub Mostar organizovali su tradicionalni šahovski turnir koji je održan na Nastavničkom fakultetu.



Učestvovala su 42 takmičara, a među studentima najbolji su bili:

Ajdin Đonko

Kenan Alić

Omer Tucaković

Svim učesnicima turnira, a posebno studentima Univerziteta "Džemal Bijedić" u Mostaru čestitamo na učešću i ostvarenim rezultatima.

DEBATNO TAKMIČENJE

By IROUNMO

Unija studenata Univerziteta "Džemal Bijedić" u Mostaru u saradnji sa Asocijacijom studenata Pravnog fakulteta Univerziteta "Džemal Bijedić", a uz podršku Pravnog fakulteta Mostar - UNMO i Misije OSCE-a u Bosni i Hercegovini, i ove godine organizuje Debatno takmičenje. Debatno takmičenje će biti održano 16. i 17. marta (četvrtak i petak) na Pravnom fakultetu.

Sistem debatovanja je KARL POPPER i svi učesnici će blagovremeno dobiti pravila takmičenja, kao i teme za debatovanje.

Za najbolje ekipe, kao i debatanta osigurane su novčane nagrade i diplome, a za sve učesnike certifikati.

Unija studenata Univerziteta „Džemal Bijedić“ Mostaru, Pravni fakultet i Asocijacija studenata Pravnog fakulteta, uz podršku Misije OSCE-a u Bosni i Hercegovini organizuje Edukaciju za sudije debatnih takmičenja.



Edukacija će se održati u petak, 3.3.2023. godine, s početkom u 11:00h, u Sali za simulovano suđenje Pravnog fakulteta.

Predavač će biti prof. Demond Đonko, koji će sa sudionicima podijeliti svoje dugogodišnje znanje i iskustvo iz oblasti debate i suđenja debatnih takmičenja.



PREZENTACIJA MEĐUNARODNIH I NAUČNO-ISTRAŽIVAČKIH PROJEKATA

By IROUNMO

Na Mašinskom fakultetu, 16.2.2023. god. je održana prezentacija međunarodnih i naučno-istraživačkih projekata koje je Univerzitet realizovao u 2022. godini. Ovo je bila osma manifestacija organizirana povodom obilježavanja 46 godina od osnivanja Univerziteta Džemal Bijedić u Mostaru.

Prva se predstavila Kancelarija za međunarodnu saradnju. Osim prezentacije svih mobilnosti koji su dostupni studentima i profesorima Univerziteta, Mirsada Behram je govorila o novinama koje se pišu u Kancelariji za međunarodnu saradnju i aktivnostima koje se održavaju kako bi se povećala vidljivosti Kancelarije.

Publika je imala priliku vidjeti prezentaciju 45 Erasmus+ ICM mreža, jednog Erasmus Mundus Joint Master Degree programa, 12 Mevlana bilateralnih sporazuma i CEEPUS programa, 10 naučno-istraživačkih projekata koje finansira Federalno ministarstvo obrazovanja i nauke, jedan 1 bilateralni projekat razmjene naučnika sa Austrijom, jedan Horizon Europe projekat, osam Erasmus+ CBHE projekata i jedan projekat koji finansiraju Vlada Ujedinjenog Kraljevstva i Sjeverne Irske.




OKRUGLI STOL

By IROUNMO

Okrugli stol koji je upriličen povodom obilježavanja Dana nezavisnosti Bosne i Hercegovine održan je danas u sali za simulovano suđenje na Pravnom fakultetu Univerziteta „Džemal Bijedić“ u Mostaru, a u organizaciji Unije studenata Univerziteta "Džemal Bijedić" u Mostaru. Na okruglom stolu su kao panelisti učestvovali prof. dr. Amra Jašarbegović, profesorica na Pravnom fakultetu i prof. dr. Adis Zilić, profesor historije na Fakultetu humanističkih nauka Univerziteta „Džemal Bijedić“ u Mostaru.

Na samom početku, prisutne je pozdravio i poželio dobrodošlicu Kenan Begović, predsjednik Unije studenata, koji je ujedno i vodio današnju aktivnost.

Prisutnima su se obratili rektorica Univerziteta prof. dr. Alena Huseinbegović i ministar obrazovanja, nauke, kulture i sporta prof. dr. Rašid Hadžović. Prof. dr. Adis Zilić se tokom obraćanja osvrnuo na historijske tokove kojim se kretala Bosna i Hercegovina od prvih spomena pa sve do raspisivanja, a zatim i održavanja referenduma o nezavisnosti Bosne i Hercegovine, te je nastojao definisati historijski kontekst koji je prethodio raspisivanju referenduma na kojem je BiH 1. marta stekla svoju nezavisnost.



Prof. dr. Amra Jašarbegović je u okviru izlaganja studentima nastojala približiti pravno-političke procese koji su prethodili održavanju referenduma o nezavisnosti, kao i ustavno uređenje suverene i nezavisne Bosne i Hercegovine. Nakon izlaganja je upriličena interaktivna diskusija u okviru koje su studenti imali priliku postavljati pitanja na koja su panelisti odgovarali.

baul - dio namještaja
ponjava - staza
dumati - duboko razmisljati

hajvan - životinja
insan - čovjek
deverati - mučiti se

IROMAG



/iro.unmo



@iro.unmo



/iro.unmo

IROMAG TEAM
MIRSADA BEHRAM
LEJLA ŠKALJIĆ
LEJLA REPEŠA
HUSEIN MARIĆ

